

釋。

○二自用土

自受用身。還依自土。謂圓鏡智相應淨識。由昔所修自利無漏純淨佛土。因緣成熟。從初成佛。盡未來際。相續變為純淨佛土。周圓無際。衆寶莊嚴。自受用身。常依而住。如淨土量身量亦爾。諸根相好。一一無邊。無限善根所引生故。功德智慧。既非色法。雖不可說形量大小。而依所證及所依身。亦可說言徧一切處。自受用身。還依自土。約能依標所依。不離于自也。謂圓鏡智相應淨識。由昔所修自利無漏純淨佛

土。因緣成熟。釋自土。出本因。不離于修也。從初成佛。盡未來際。相續變為純淨佛土。周圓無際。衆寶莊嚴。釋土相。極橫豎。不離于變也。自受用身。常依而住。如淨土量身量亦爾。釋身依量如土。自用自也。諸根相好。一一無邊。無限善根所引生故。釋自身相好。徧從因生也。功德智慧。既非色法。雖不可說形量大小。而依所證及所依身。亦可說言徧一切處。例功德與智慧。悉周徧也。依所證者。謂二空真如。依所依身者。謂自法性身也。以上逐段出意。如此。若夫總其脈絡。是周圓無際。衆寶莊嚴。盡未

來際相續純淨。自受用上。由於大圓鏡智所變。智變又由往昔所修自利純淨佛土因緣成熟而起。自受用身常依此土而住。身如土量相好無邊。亦從善根引生而起。其非色法之功德智慧者。依所證二空真理所依自法性身。徧一切處。功德智慧起於證。證起於修。修之時義大矣哉。

○三他用土

他受用身亦依自土。謂平等智大慈悲力。由昔所修利他無漏純淨佛土因緣成熟。隨住十地菩薩所宜變爲淨土。或小或大。或劣或勝。前後改轉。他受用身。

依之而住。能依身量亦無定限。

他受用身亦依自土。約能依明所依。不離於他也。謂平等智大慈悲力。由昔所修利他無漏純淨佛土因緣成熟。卽他土明土因起於修也。隨住十地菩薩所宜變爲淨土。或小或大。或劣或勝。前後改轉。卽他土明土相變於宜也。他受用身依之而住。能依身量亦無定限。釋依土身如土量無定也。上隨段出意如此。若總其脈絡。則隨住十地菩薩所宜大小勝劣前後改轉。他受用之淨土起於平等智大慈悲力之隨變。智力隨變。又由往昔所修利

他無漏純淨佛土因緣成熟而起也。修可後乎。利他無漏因緣者。如直心是菩薩淨土。菩薩成佛時。不誚衆生來生其國等是也。或大小勝劣者。如初地所見淨土。望於二地爲小爲劣。二望於初。卽爲大爲勝矣。展轉而上。直至法雲層層大小。勝劣可知。

○四變化土

若變化身。依變化土。謂成事智大慈悲力。由昔所修利他無漏淨穢佛土因緣成熟。隨未登地有情所宜。化爲佛土。或淨或穢。或小或大。前後改轉。佛變化身。依之而住。能依身量。亦無定限。

若變化身。依變化土。約能依。明所依。不離於化也。謂成事智大慈悲力。由昔所修利他無漏淨穢佛土因緣成熟。卽化土。明土因。因於修也。隨未登地有情所宜。化爲佛土。或淨或穢。或小或大。前後改轉。於化土明土相。化於宜也。佛變化身。依之而住。能依身量。亦無定限。明依土。身如土。量無定也。逐段出意如此。若總其脈絡。則隨未登地有情所宜。或淨穢大小前後改轉之變化土。化於成事智之大慈悲力。智力與化。又由於往昔所修利他無漏

淨穢佛土因緣成熟而起也。修可後乎。問。佛所修因無非淨行。寧有穢土成熟之理。而云然者何也。曰。以衆生根性不等。宜順導者現淨以攝之。宜逆化者示穢以折之。彌陀現居極樂。迦文示生堪忍。諸菩薩等。隨所化生而取佛土是也。淨穢大小前後改轉者。淨改爲穢。穢轉爲淨。大轉爲小。小改爲大也。如梵王見此佛土。無非七寶。身子見此佛土。無非瓦礫。是改轉淨穢大小可知矣。能依身量亦無定限者。丈六八尺至三尺等。亦各隨機所見。佛身何有定量。

○三合明身土二 初分簡二通簡

○初分簡

自性身土。一切如來同所證故。體無差別。自受用身及所依土。雖一切佛各變不同。而皆無邊不相障礙。餘二身土。隨諸如來所化有情。有共不共。所化共者。同處同時。諸佛各變爲身爲土。形狀相似。不相障礙。展轉相雜爲增上緣。令所化生自識變現。謂於一土有一佛身。爲現神通說法饒益於不共者。唯一佛變。諸有情類。無始時來。種性法爾更相繫屬。或多屬一。或一屬多。故所化生有共不共。不爾。多佛久住世間。

各事劬勞實爲無益。一佛能益一切生故。

分簡者。於身土合明中。分簡自性身土。自用身土。他用變化之身土也。自性身土竟同。一切如來體。無差別同所證故。自用身土不同而同。不同者。一切諸佛各別因緣。各變身土。各變不同。而同者。雖各變不同。而皆無邊。不相障礙故。他用變化。隨諸如來所化有情。有共不共。共者。隨諸如來所化有情同處同時。諸佛各變爲身土。而身土形狀相似。不相障礙。展轉相雜爲增上緣。如阿閼彌陀藥師寶集。同化爲迦文一身。令所化生。自識變現。謂

於一土。有一佛身爲現神通說法饒益。名曰共也。不共者。唯一佛變。非多佛共變。設見十方百千化佛。亦是一佛化現諸身。曰不共也。然所以共不共者。諸有情類。無始時來。同具佛種。共有佛性。種性法爾。與諸如來更相繫屬。或多類衆生。因緣唯屬一佛所化。隨所化生。變一身土。不同多佛共變而化。故不共也。或一類衆生。因緣屬多佛共化。故須諸佛同時同處。各變身土。形狀相似。令所化生。自識變現。謂於一土。有一佛身。故得共也。若不爾者。多佛久住世間。各事劬勞。實爲無益。何以故。一佛

能益一切衆生。何以多佛爲耶。

○二通簡二。初明所變漏無漏別。二明所變四分虛實。

○初明所變漏無漏別。

此諸身土。若淨若穢。無漏識上所變現者。同能變識。俱善無漏。純善無漏。因緣所生。是道諦攝。非苦集故。蘊等識相。不必皆同。三法因緣雜引生故。有漏識上所變現者。同能變識。皆是有漏。純從有漏因緣所生。是苦集攝。非滅道故。善等識相。不必皆同。三性因緣雜引生故。蘊等同異。類此應知。不爾。應無五十二等。

於身土合明中。通簡所變四種身土。有漏無漏之不同也。謂此四種身土。若淨若穢。約佛無漏識上所變現者。則所變身土。同能變識。俱善無漏。所以然者。從純善無漏。共不共等種子。因緣所生。是道諦攝。非苦集所攝故也。恐有疑云。能變之識。無漏所變身土。亦無漏。則能變是識。所變亦應唯是識相。無蘊等差別耶。故通云。蘊等識相。不必皆同等。謂能變雖是識。所變蘊相。不必皆識相。以從無漏戒定慧解脫。知見蘊處界三種引生故也。此四種身土。若約九界有情。有漏第八識上。託佛身土爲

質所變親相分者。則所變身土。同能變識。皆是有漏。所以然者。純從有漏種子因緣之所生。是苦集攝。非滅道所攝故也。恐又疑云。若能變是有漏。所變亦有漏。則能變識性。是無記。所變亦應唯是無記性耶。故通云。善等識相。不必皆同等。謂能變之識。是無記。所變不必皆同。無記識相。以從識中三性種子雜引生故。蘊等同異。類此應知者。亦應云。爾應無五蘊十二處十八界耶。無是理也。問。諸佛身土淨穢。約佛識變。則純無漏。約九界。則純有漏。

竊有疑焉。何則。法性純淨無漏。無俟論矣。他用變化。雖是隨機。而佛識變。則穢亦是淨。漏亦無漏。亦無俟論矣。他用變化。有淨有穢。約有情識變。則六道異生。地前三賢。穢與有漏。又無俟論矣。乃初歡喜。以至法雲。既非是穢。安得皆有漏耶。曰。十地之位。雖高。而第八未轉。尚在有漏。則能變第八。託佛身土為質。所變親相。安得不同於能變之有漏乎。若夫對下。稱高待凡。名聖則身土千差。又當別論。殊非通簡身土之大較意也。以上皆約此論本文。順體口氣而解。若約佛地論。如是淨土。主既圓滿。

應有輔翼。主必攝受輔翼者。故諸大菩薩衆所雲集。諸聲聞等。無如是事。謂初地上諸菩薩衆。雖不能集諸佛自利受用淨土。而能集會諸佛利他受用淨土。諸佛慈悲。於自識上。隨菩薩宜現。麗妙土。菩薩隨自善根願力。於自識上。似佛所生淨土相現。雖是自心各別變現。而同一處。形相相似。謂爲一土。共集其中。如是地上菩薩淨土。爲是有漏。爲是無漏。有義無漏。謂自心中。後得無漏淨土種子。願力資故。變生淨土。於中受用大乘法樂。以初地上諸菩薩衆。證真如理。得真無漏。處真法流。住真

淨土。常見諸佛。故所變土。是真無漏。道諦所攝。有義有漏。謂自心中。加行有漏淨土種子。願力資故。變生淨土。於中受用大乘法樂。以彼菩薩。雖證真如。得真無漏。而七地來。煩惱現起。乃至十地。尚有修斷煩惱種子。及所知障。第八識體。能持彼故。現受熏故。猶是有漏。無記性攝。有爲無漏。道諦所攝。決定是善。若十地中。第八識體。是無漏善。應知佛地不離執持有漏種子。不應受熏。第八識體。既是有漏。無記性攝。所變淨土。云何無漏。善性所攝。又一有情。無二實身。其身爾時。既是有漏。所依淨土。

云何無漏。是十地菩薩淨土。是妙有漏。苦諦所攝。如實義者。十地菩薩。自心所變淨土有二。若第八識所變淨土。是漏識相分攝故。是有漏身所依處。故雖無漏善力所資熏。其相淨妙。而是有漏苦諦所攝。隨加行等。所現亦爾。若隨後得無漏心。變淨土影像。是無漏識相分攝故。從無漏善種子生故。體是無漏。道諦所攝。言蘊等者。卽無漏五蘊。一無漏淨戒。名爲戒蘊。二無漏定。名爲定蘊。三無漏慧。名爲慧蘊。四無學勝解。名解脫蘊。五無學正見。名解脫知見蘊。前三是因。後二是果。五蘊法界。一切

三乘功德所依。通學無學。無學圓滿戒定慧三法。因緣雜引生故。學位分得戒定慧三。隨用一性所引生故。蘊等同異。滿分淨染。類此應知。第八有漏所變身土。亦是有漏。後得無漏所變身土。亦是無漏。故言同也。第八所變。不同後得。後得所變。不同第八。故言異也。不爾者。牒前一往所談。身土皆是隨他變現。若不變現。則又何有五蘊十二處十八界之建立也哉。以上具錄。以便參考。

○二明所變四分虛實。二 初初解。二 二解。

○初初解

然相分等依識變現。非如識性依他中實。不爾。唯識理應不成。許識內境俱實有故。

此至心與心所定相應故。於身土合明中。通簡所變四種身土虛實之不同也。初正釋。二反釋。正釋者。然相分等依識變現。非如識性依他中實者。相見二分曰相分等。又等等。自證識性曰依他。形上相見是徧計。依他曰中實。形上相見是虛妄。意謂相見二分爲徧計所執。自證識性爲依他而起。依他起法。自因緣生。是妙俗諦。可言唯識。徧計所執。由分別起。是虛妄執。故云非如識性。依他中實。復

反釋以決之云。不爾。唯識理應不成。所以然者。許識內境俱實有故。謂識所變心內之境。而識與內境皆是實有。安可不爾。此師之義未盡。下文自顯。

○二二解

或識相見等從緣生。俱依他起。虛實如識。唯言遣外不遮內境。不爾。真如亦應非實。內境與識既並非虛。如何但言唯識非境。識唯內有。境亦通外。恐濫外故。但言唯識。或諸愚夫。迷執於境。起煩惱業。生死沉淪。不解觀心。勤求出離。哀愍彼故。說唯識言。令觀自心。解脫生死。非謂內境如外都無。或相分等皆識爲性。

由熏習力似多分生。真如亦是識之實性。故除識性。無別有法。此中識言。亦說心所。心與心所。定相應故。此護法正義也。初正釋虛實。次難問虛實。三答明唯識。承上初師四分虛實。已如上陳。或有異於前。釋者曰。識相見分。自證證自證。皆從緣生。俱依他起。自非初師相見屬於徧計之虛。識性屬於依他之實矣。然而四分俱是實耶。故云虛實如識。良以約真勝義言。識如幻夢。相見何得云真。其虛固如識也。依世俗諦言。有依他識。相見何得是虛。其實亦如識也。虛實如識而言唯者。爲遣心外之境。不

遮心內之境。故不違於唯耳。若謂不然。本智所緣。真如內境。亦應非是實耶。然恐難云。內境與識。既並非虛。當唯境識。但云唯識何耶。故三釋以通之。一恐濫外境言唯識。二愍存內境言唯識。三統攝識性言唯識。恐濫者。識唯內有。境則不但內有。亦通外有者也。若言唯境。卽濫外計。故但言唯識耳。愍存者。或諸愚夫。迷執外境。起惑業。因受生死果。不解觀我內心。勤求出離。大聖愍彼。說唯識言。令自觀心識。不迷外境。起惑造業。解脫生死。非謂心內之境。如徧計之外境。都無。而單言唯識比也。統

攝者或內境相分等。亦識爲體。由熏習力。似四分生。此四分不離識性也。真如內境。亦是識之實性。真如又曷嘗離識性耶。故除識性外。無別有法。識之一言。攝無不盡。且心所與心相應。雖言唯識。心所自統於中。故但言唯識。若千山之止於嶽邊。萬派之消於海上耳。寧有纖毫攝之不盡者哉。不必疑也。

○四釋題回向

此論三分成立唯識。是故說爲成唯識論。亦說此論名淨唯識顯唯識理極明淨故。此本論名唯識三十。

由三十頌顯唯識理。乃得圓滿非增減故。已依聖教及正理。分別唯識性相義。所獲功德施羣生。願共速登無上覺。

初釋題。二回向。釋題三義。初謂此論三分成立唯識。名成唯識論。三分者。宗因喻爲三分。亦可初稽首一頌。名宗前敬敘分。次三十頌。名依教廣成分。後已依一頌。名成就施願分。亦名三分。二說雙具。前三爲正。蓋十卷之多。必以三支成立唯識故也。二此論名淨唯識。顯唯識理極明淨故。極明淨者。顯理究竟。殊無一毫不盡。曰極明淨也。又顯識究

竟圓成實性無垢識故。曰極明淨。二說圓具。前說爲正。蓋十卷之多。展轉顯理究竟無垢之識自在故也。三此本論名唯識三十。由三十頌顯唯識理。乃得圓滿。非增減故。圓滿無增減者。一三十頌。從因至果。顯唯識理。離於增減損益之義。恰中其妙。乃得圓滿。二釋三十頌。從頌至頌。顯唯識理。字字句句。遠離增減之過。巧適其中。乃得圓滿。而要之。雙含二義爲完。蓋十卷之文。不離三十頌。三十頌全處十卷之論文故也。二回向者。已依聖教及正理。分別唯識性相義。是依教理造論。所獲功德施

羣生。願共速登無上覺。是修回向發願。性相者。前八卷是顯唯識相。後二卷是顯唯識性。雖性不離相。相全顯性。而隨義隨文。倫次不得不秩然耳。功德有三。一卽性之具。曰德。全德之能。曰功。所謂常樂我淨等。本覺性功德也。二由修而得。曰德。卽德之能。曰功。所謂不共無畏等。始覺修功德也。三雖卽本而始。全修全性。名究竟覺。亦不分而分焉。若按慈氏之論。修德。則有讀誦總持。漏與無漏。通別之辨。讀誦。但熟於文。總持。兼了於義。讀誦。唯屬聞慧。總持。兼屬思慧。讀誦。總持。名通修行。唯屬有漏。

修慧屬別修行。唯攝無漏。所獲功德者。或通有漏。或唯無漏。裴師譯信金剛福德曰。生如是福德。取如是福德。生也者。指修時所植種子言也。取也者。指從種所發現行言也。乃什師統生取而譯之曰。得如是福德。今獲者得也。以此施生。名爲法施。登無上覺。是佛道無上誓願成。共登無上覺。是衆生無邊誓願度。煩惱無盡法門無量誓願斷。學自在其中矣。或曰。欲速不達。儒者有是言也。况無上覺乎。曰。敏則有功。儒者亦有是言也。况無上覺乎。不知速者精進義。聖王曰。無逸。覺皇曰。慎勿放逸。精

進貫於諸度。諸度之中。精進最爲有力。惟願痛無常危脆之身。念常住圓成之識。既汨沒於三有愛河之水。須撈攬於十卷心海之文。扞之。又扞。扞之不已。極力而海波元減。索之更索。索之不休。罔象而神珠自呈。精進煥然。千生只在一生。懈怠瞥爾一誤而成百誤。相與勉旃。共勤砥礪。已遵教理及師命。訂正唯識性相義。所獲功德。施舍識願證識心三昧海。

賢願

成唯識論訂正卷第十

姑蘇信女張門
李氏大緣助板



國家圖書館, NATIONAL CENTRAL LIBRARY, TAIWAN, R.O.C.

助刻姓氏

管宗顏
方昌毓
沈大用
德純

徐昌時
施大脫
劉大恒
定心

嚴梅
施時化
廣淨
道廬

戴文光
鄔夫材
大觀